

葛樵溪續龍文鞭影
署

袁金鎧

續龍文鞭影卷四

復縣葛泰源樵溪著

一屋

陳擊火節

譚開金筑

王桂子園

冕梅花屋

家食日華

齋居都穆

貞伯九經

宗堯三速

薛蕙栽花

陳芹畫竹

松雪子淵

蒲塘文昱

●記陳壽巡撫延綏。羽書交至。壽分兵爲十路。各屯駐要害。使相應援。火節諸酋率衆大至。先以百騎爲前鋒。諸將請戰。壽曰。此誘敵也。自擁數十騎出帳。據胡牀。指揮飲食。如無事時。敵望見疑之。遂引去。旣而諸路將領受方略。邀擊之。大捷。奏聞。同事諷壽註子弟名入戰籍。壽曰。吾子弟不諳弓馬。竟不許。時論多

之。

○記譚昌言。婺源令。有爭山之訟。門殺不解。昌言封山著禁。有鑿石鎔灰者。罰無赦。訟頓息。開江灣金筑嶺。以避芙蓉五嶺之險。民便之。呼爲譚公嶺。

○記王道行。字明甫。陽曲人。官至右布政。歸田。構別業。稱桂子園。日與騷雅之士。觴咏其中。

○記王冕。字元章。諸暨人。一試進士舉。不第。焚所爲文。讀古兵法。著高簷帽。被綠蓑衣。履長齒木屐。擊木劍。或騎黃牛。持漢書以讀。人咸目爲狂生。晚隱九里山。結廬三間。題曰梅花屋。生平工畫梅。人爭求之。

○記李日華。字君實。嘉興人。仕至太僕少卿。恬於仕進。後先家食二十年。能書善畫。精賞鑒。一時士大夫。風流儒雅好古博物者。咸推之。

劉知慚服
猶有人心

六記、都穆。字元敬。居吳縣之南濠。人稱爲都南濠。仕至太僕少卿。歸老之日。齋居蕭然。或至乏食。輒笑曰。天壤間當不令都生餓死。

七記、李應楨。字貞伯。長洲人。以善書入中書。詔諸舍人書佛經。應楨言。天下國家有九經。未聞有佛經也。上恚。廷杖幾死。尋致仕歸。郡守劉征斂苛急。應楨作虎渡河詩致之。守怒。按其籍。乃無寸土。詰其家。無浹旬積。始慚服。

八記、見二十五徑青螺收錠註。

九記、薛蕙。字君采。仕吏部郎中。大禮議起。撰爲人後辨。數萬言。緣是罷職。屏居西原。栽花養魚著書。樂道自守。泊如也。

十記、陳芹。字子野。江寧人。善畫竹。文徵明戒其門人曰。至金陵。慎勿畫竹。彼中有人也。領薦爲奉新令。居官九十日。卽謝病歸。起邀笛閣於秦淮。招一時名流。

結青溪社。每月觴詠不輟。金陵文酒之盛。至今尤豔稱之。

●記陸深。字子淵。上海人。詩文與李崆峒、徐迪功相上下。字學比於趙松雪。入翰林。經筵講畢。面奏云。今日講章。非臣原撰。乞自今容講臣得盡其愚。退。復條奏有關聖德者。凡千餘言。當路忌之。左遷外僚。仕至詹事。

●記張文昱。知邵武府。廉介愛民。善詩文。尤精於畫。號蒲塘散人。後陞刑部侍郎。

二沃

考叔丹青

王賢緋綠

錫爵爭封

從龍變俗

李輻歸心

楊清染足

龍首渠忠

鮑公隄旭

以信文章

存仁幹局

權相江陵

名儒李勣

一記。魏之璜。字考叔。上元人。業丹青。娛養老親。撫諸弟。皆取給於十指。不以干人。軒車過訪。不一報謝。惟招之飲酒。則往。清言獻酬。坐無考叔不樂也。

二記。王賢。寧陽人。嘗夢人授以書。曰。讀此可衣緋。不讀此止衣綠。數日。於路得一書。視之。青烏家說也。潛玩久之。乃以善地理聞。時爲鈞州佐。上取以往。命相地。得寶九郎故址。曰。勢如萬馬自天而下。眞天子地也。

三記。王錫爵。字元馭。太倉人。直內閣時。冊立未定。並封議起。錫爵爭之力。上略不爲忤。後國本既定。遂辭位。然上屢思之。後召入輔政。而病不起矣。諡文肅。

四編。從龍。安陸人。宏治中。知麻哈州。時民未知學。龍聘名儒訓之。俗爲之變。民立祠以祀。

五編。李輻。吉水人。萬曆間。知騰越州。洊事勤敏。備禦嚴整。終輻之任。守城者終

日不敢弛。素爲武衛見憚。出南關閱。集市者數千人。肅然無聲。時方采寶石於猛密。蠻人數聞輻威望。對商人曰。委官得如李公來。必不欺擾我土。其爲遠人歸心如此。

六記。楊清。建昌所千戶。閩寇亂。清統兵勦襲。臨行。用鳳仙花染足指。屬家人曰。他日尋吾屍。以此爲識。後與敵戰。果死之。

七記。項忠。巡撫陝西。關中水泉斥鹵。宋有龍首渠。歲久湮廢。忠奏開一渠。餘三十里。民得甘飲。涇陽鄭白渠。亦奏募工疏通。名廣惠渠。凡溉田七萬頃。滿四之亂。忠設計坐困之。日披堅督軍於城下。矢石如雨。略無懼色。或勸其持重。忠曰。奉命討賊。久無成功。死所甘心。輿論偉之。四遂成擒。

八記。鮑旭。知興國州。治民以慈愛爲本。有冤抑者。急爲伸理。嘗修常平倉六所。

擢節出納。數年郡額殷富。朝天隄圯。鑿以石。建石亭於其上。人名爲鮑公隄。
九記。鄒以信。知無爲州。莅事精詳。政崇德教。郡人化之。以博學能文。咸謂文章
太守。

十記。李存仁。知新喻縣。廉幹有機局。初抵任。佯爲不知事體。逾月。閭里銖兩之
姦。悉知之。一時豪右。摧抑淨盡。境內大治。

十一記。張居正。字時大。江陵人。神宗幼沖。居正受遺枋政。一以尊主權。強國勢。爲
務。有古重臣風。時以權相目之。久而論定。乃思其功在社稷也。卒諡文忠。

十二記。李勛。字文勉。山陰人。少好與文士遊。鄉先生鎰績。王誼。鄭嘉。謂曰。爾欲從
我輩遊。須讀書乃可。感悟力學。遂成名儒。時稱鎰。王。鄭。李。

有志者

三覺

誓神孫蘭

斷鬼石璞

竹樹敷華

柏花奇溯

督餉大川

均田危嶽

戴弁蒙荈

徐琦衛學

王履楷模

朱升帷幄

一庵唐樞

八旬劉珏

○記王孫蘭。南韶兵備。時張獻忠寇湖南長沙。衡永皆陷。韶境接壤。孫蘭謂無韶則無粵。誓神死守。請兵不應。屬邑皆聞風潰。韶吏民縋城走。手劍當門。不可止。知事不可爲。北面再拜。冠帶自縊死。

○記石璞。江西副使。剛介有治才。所至著稱。在江西時。有民娶婦三日。壻婦往拜其家。壻先歸。婦後失之。遍索不獲。婦翁訟壻殺女。壻不勝撈掠。自誣服。璞獨疑殺人而棄屍。必深怨者爲之。彼新婚燕好。胡乃爾爾。夜齋沐焚香祝曰。此獄關綱常。萬一婦與人私。而夫枉死。且受汙名。於理安耶。神其以夢示我。果夢神

授一麥字。璞曰：此兩人夾一人也。獄有歸矣。比明，令械囚，待時行刑。囚未出，璞見一童子窺門內，乃令人牽入，曰：爾羽客，胡爲至此？得非爾師令偵某囚事乎？童子大驚吐實。乃二道士，素與婦通，見匿之叢麥中。江西人因號之斷鬼石。

三記：張敷華，字公實，安福人。少有奇氣，里中竹樹爲怪。敷華年七歲，卽指揮羣兒，盡斬去。後官南臺，與林瀚、林俊、章懋稱南都四君子。尋召還內臺，與華容、鈞陽、浮梁同心效職，並稱名卿。卒諡簡肅。

四記：朱奇溯，晉府西河王。有孝行。母病渴，王仰祝天，甘泉湧出。母卒，哀毀骨立。宮墀古柏生花，人謂孝感所致。

五記：呂大川，字中源，新昌人。守惠州府，有善政。征劇賊張權，大川隨軍督餉。察脅從者釋之。所至，召父老，諭以禮義禍福，莫不感動。番禺張詔曰：呂惠州可謂

霜雪之陽和。戎馬之俎豆。

六編危獄。黔陽人。嘉靖進士。授吉安府推官。吏治精敏。奉檄均九縣田。民咸德其公平。

七記戴弁。浮梁人。以兵科給事中。奉詔行邊。簡士卒。嚴戍守。邊備整飭。陞陝西參議。城迭烈以禦寇衝。屯張掖以助軍餉。調廣東參政。適廉雷諸郡獠獍梗化。挺身出。諭曰。我戴參政也。爾等何敢冒死。賊曰。公至誠愛民。我何敢犯死。羅拜而退。仕至布政使。所著有蒙菴集。

八記徐琦。字良玉。寧夏戍籍。張本薦琦才略。洞達邊務。兩使安南。終南京兵部尚書。明初軍衛舊無學。宣德十年。詔天下衛所。與府州縣同城者。皆立衛學。從琦請也。卒諡貞襄。

九記王履。字安道。崑山人。能詩文。工繪事。精醫藥。教授鄉里。爲後進楷則。嘗遊華山。作圖四十。記事詩一百五十。窮覽太華之勝。古今一人而已。而繪事亦大進。或問何師。曰吾師心。心師目。目師華山。

十記朱升。休寧人。明太祖起兵時。至徽州。聞其名。召問方略。對曰。高築牆。廣積糧。緩稱王。上悅其言。命參謀帷幄。

十一編唐樞。字維中。歸安人。嘉靖進士。授刑部主事。樞少學於湛若水。深造實踐。以自得爲宗。四方從遊者衆。監司爲創一菴書院居之。學者稱一菴先生。

十二記劉珏。字廷美。仕至僉事。操履清白。老而好學。工唐律。時稱劉八句。

四質

文灝能三

王徵可一

謝杰春場

林鍾冬日

李號野齋

邢居陋室

閩縣王恭

蠻溪杜述

董賦朝鮮

許攻哈密

霞客紀遊

雲奇衝蹕

一記姚文灝。湖廣提學僉事。以作人自任。嘗自謂所能者三。毀譽不入。請託不行。賄賂不通而已。

二記王徵。字良輔。三原人。自號可一道人。以僉事里居。李賊入關中。知不免。手題墓石曰。明進士可一道人之墓。又書全忠全孝四大字。付其子。曰。吾死豈爲名。欲汝識吾志耳。絕粒七日而卒。

三記春場。在東直門外。大京兆之所。中有春亭。萬曆間。府尹謝杰建。

四記林鍾。字仲鏞。崑山訓導。諸生翕然宗師之。謂與林先生語。如冬日送暖。膚革充然。覺意表言外。別有箴規。莫不願若其訓。退而各自得也。子泉。能讀父書。

周襄王稱爲君子。

⑤編李謙字受益。東阿人。官至學士。文章醇厚。學者宗之。號野齋先生。

⑥記邢量字用理。長洲人。陋室三間。青苔滿壁。閉門讀書。平生不娶。長日不舉火。惟啖餌一二而已。郡守或請其詩。量曰。古有采詩。無獻詩。吾豈以詩爲羔雁哉。遂削其草。

⑦記王恭字安中。閩縣人。少遊江海間。中年葛衣草履。歸隱七巖山二十年。自稱皆山樵者。永樂中。以薦待詔翰林。與修大典。書成。投牒歸。

⑧記杜述。慈利知縣。處已廉介。德化一方。嘗入蠻溪採木。夷獠爭來迎勞。奉之如己親焉。

⑨記董越。寧都人。累官南京工部尙書。嘗奉使朝鮮。著朝鮮賦。清介端謹。館閣

霞客遊記
爲地理最
要之書是
真善遊者
文詞亦雅
令

推重。諡文僖。

⑩記許進巡撫甘肅時。哈密爲土魯番所占。且大舉寇甘肅。進曰。旣不能威服其心。又無自立之計。宜乎有今日也。乃用以夷攻夷之法。分兵兩路。調赤斤罕東各番兵。深入二千里。直抵哈密。克奪其城。考之前代。從無有以兵涖其地者。

⑪記徐弘祖。字霞客。江陰人。好游。一杖一襆被。往復萬里。如步武。中國名勝無不到。乃窮河沙。上崑崙。歷西域。去中夏三萬四千里。題名絕域。與漢張騫。唐玄奘。元耶律楚材。而爲四。其紀遊之書。高可隱几。

⑫記雲奇。南海人。洪武間。內使。發胡惟庸逆謀。衝御蹕。捶斃。上追悼。賜葬鍾山西。

五物

就子楊彝

通經鄧韜

思白三無

張基四勿

持筆屠蒲

聞簫王紱

猛如虎殲

余學夔乞

馮貴練兵

王嵩革佛

滄海沐昂

藍山蕭祓

○編楊彝。餘姚人。洪武中。爲考功司主事。以子被誣。戍普安。彝往就食。居於東屯。四面多松。開軒其中。自號萬松老人。著有鳳臺貴州東屯南遊諸集。又天風亭。在普安州西北。明楊彝所居。

○記鄧韜。字文度。常熟人。中鄉薦。母死。遂不上公車。以通經博古爲學。嘗仿呂成公作大事記。論次古今得失。曰。如有用我。執此以往。

○記董其昌。字思白。華亭人。精思力學。以書畫見推海內。陳眉公嘗稱其昌有三無。筆下無疑。眼中無翳。胸中無一點殺機。官禮部尙書。諡文敏。

文敏不見
明亡爲最
有造化之
人

④記、張基。字德載。吳縣人。舉鄉薦。以母老。不忍離。屏冠服爲野人裝。顧自檢日。益嚴。嘗銘座右曰。勿展無益身心之書。勿吐無益身心之語。勿近無益身心之人。勿涉無益身心之境。羅文恭以爲四勿銘云。

⑤記、屠浦。字朝宗。鄞縣人。歷冢宰掌憲。平生無戚容慍色。推賢讓能。惟恐不及。嘗曰。吾持此筆。掌刑憲。惟恐悞殺一人。掌銓衡。惟恐悞黜一人。卒諡忠惠。

⑥編、王紱。字孟端。武進人。高介絕俗。工詩翰。畫竹尤冠一時。嘗於旅邸月夜。聞鄰家簫聲清亮。乘興寫竹石一幅。明早訪其人贈之。蓋一富商也。商人大喜過望。次日奉幣求更畫一幅作配。紱怒曰。俗子何足當我筆。亟索而碎之。

⑦記、猛如虎。總兵。守南陽。奮勇出戰。殲賊數千。城破。猶持短刀力戰。至唐王府門。叩首稱負恩。賊鬱殺之。參將劉士傑。遊擊郭關。守備猛先捷。俱戰死。